

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-77234330 (mobile) email: laohamutuk@gmail.com

Website: www.laohamutuk.org



Dili, 05 Julu 2021

Bodik ba: Prezidente da Repúblika Demokrátika Timor-Leste, Primeiru Ministru, Ministra
Negósiu Estranjeiru no Kooperasaun

Cc: Misaun RDTL ba ONU, Media no Públiku

Asuntu: Timor-Leste tenke apoiu demokrasia no direitu umanu iha Mianmar

Ho respeito,

La'ó Hamutuk, hanesan organizasaun sosiedade sivil ne'ebé defende demokrasia, direitu umanus, no solidariedade iha Timor-Leste no mundu tomak, sente triste atu hare Timor-Leste la barani atu vota a favor iha Rezolusaun 75/287 ne'ebé hetan aprovasaun iha Assembleia Jerál ONU nian iha loron 18 fulan Juñu, no votasaun 119-1. Nasaun 36 de'it, inklui Timor-Leste, abstain husi votasaun ne'e. Rezolusaun ne'e kondena golpedestadu militar iha Mianmar no husu ba nasaun hotu atu la fó armas ba rejime militar iha ne'ebá. Ami husu estadu RDTL atu informa ONU katak abstensaun la tuir Governu nia intensaun. Karta hanesan ne'e bele fó hanoin ba comunidade internasionál no ditadór iha Mianmar katak Timor-Leste nafatin tuir ita nia prinsipiu sira.

Timor-Leste nudár país de direitu demokrátiku ne'ebé iha responsabilidade boot atu apoiu direitu umanu, demokrasia no liberdade povu hotu. Ita nia istória luta ba ukun rasik an mós la sees husi apoiu solidariedade husi comunidade internasionál sira ne'ebé hatudu sira nia solidariedade ba povu Timor nia luta hodi kore an husi rejime ditadura militar Indonézia.

Relatóriu CAVR, CHEGA! Relata no rekomenda ba comunidade Internasionál tomak atu promove ativamente direitus Umanus no demokrasia. Ami kontente katak relatóriu ne'ebé entrega ona ba Nasoins Unidas, nasoins boot sira no organizasaun Internasionál hodi promove no proteje ba beibeik direitus Umanus no demokrasia. Timor-Leste mós labele haluha lalais sofrémentu todan ne'ebé hetan husi Militar Indonézia durante okupasaun ilegal iha tinan 24 nian laran.

Ohin loron Timor-Leste goza nia independénsia maibé labele haluha apoiu sira ne'ebé ita buka, no dala ruma hetan, durante luta naruk iha pasadu. Ho votu abstain iha rezolusaun ONU, estadu Timor-Leste hatudu derrota atu defende demokrasia no direitu umanu sira,

tanba defende aktu ilegál ne'ebé akontese hela iha Mianmar. Ami hanoin estadu Timor-Leste labele sakrifika Konstituisaun RDTL, tratadu internasionál ne'ebé ita ratifika ona, no prinsipiu estadu de direitu demokrátiku tanba hakarak atu hein unanimidade iha ASEAN, ka tuir Xina nia hakarak.

Iha tempu 1975-1999, nasaun hotu iha ASEAN apoiu Indonézia nia okupasaun, maibé agora iha mudansa. Membru ASEAN balun, Indonézia, Filipina, Singapura, Vietnam no Malázia, vota favor ba rezolusaun ida ne'e. No embaixadór Mianmar rasik vota favor, tanba nia la rekoñese lejitimidade ba rejime militar ne'ebé kaer poder iha fulan Fevreiru tinan ida ne'e.

Hanesan ita hotu hatene konflitu iha Myanmar ne'e kontra povu no sistema demokrátiku iha Myanmar; ativista, labarik, feto no ema vulneravel sira sofre iha tinan barak nia laran husi rejime ditadura militar ida ne'e.


Nune'e, La'o Hamutuk lamenta no triste tebes haree votu absteinsaun ne'ebé Timor-Leste fó durante diskusaun no votasaun iha Assembleia Nasoins Unidas ba situasaun Polítika no direitus Umanus atuál Mianmar nian. Ami hanoin katak, loloos karik Timor-Leste mak tenke sai ezemplu no pioneiru luta ba auto determinasaun, demokrasia no direitus Umanus, infelizmente akontese fali oportunismu iha votu importante ida ne'e. No ami husu ba Sua Exelénsia sira atu esplika ba povu tomak no ba comunidade internasionál tanba sá Timor-Leste decide votu abstain, no oinsá Timor-Leste bele tuir dalan di'ak liu iha futuru?

Ikus liu, ami enkoraja polítika na'in sira atu tetu ho didi'ak inklui konsidera impaktu sira molok decide fó votu ba rezolusaun ONU nian, desizaun ne'e sei representa Timor-Leste iha mundu. Ami husu atu labele repete tan desizaun hanesan ne'e iha futuru tanba de'it ambisaun ou intervensaun ruma husi li'ur.

Ami be saran lia,



Marta da Silva




Charles Scheiner



Mariano Ferreira



Celestino Gusmão



Elizaria Febe Gomes



Bree Ahrens